

Акафист
Пресвятой Богородице
пред иконой Козельщанская
Празднование 6 марта (21 февраля)

Кондак 1

Избранней Владычице и Заступнице рода христианскаго, знаменьи чудес дивных от святыя Своея иконы в стране нашей возсиявшей, благодарственная и умиленная пения немолчно приносяще, яко Матери Господней, в печалех наших и болезнех вопием:

Радуйся, скорая Утешительнице и Целительнице, любовь Свою и милосердие нам являющая.

Икос 1

Архангели и Ангели, Херувими и Серафими и вся Небесныя Силы, зряще Тя на небеси и на земли, яко неисчерпаемый источник благодатных исцелений, непрестанно славят Тя, Присноблаженная Богородице: мы же, грешнии на земли, поминающе дивное знамение милости Твоея, еже в сия последняя времена явила еси в цельбоносней иконе, наследии предков дражайшем, от лет древних из рода в род преходящей, ублажаем Тя сице:

Радуйся, Небесная Царице, честнейшая Херувим и славнейшая без сравнения Серафим; радуйся, от всех родов на земли похвалами ублажаемая. Радуйся, одесную Сына Твоего и Бога предстоящая; радуйся, ко Господу Спасу всех нас приводящая. Радуйся, яко

в видимом образе Твоем невидимую силу благодати обретаем; радуйся, яко на Твое предстательство все упование наше возлагаем.

Радуйся, скорая Утешительнице и Целительнице, любовь Свою и милосердие нам являющая.

Кондак 2

Видящи Тя, Благосердая Мати, в пречудней иконе Твоей, якоже сущую с нами, страждущая в неисцельном недуге девица Мария, со слезами и верою объят икону Твою, лобызаючи ю и чаючи от Тебе великия милости. Темже исцеление улучивши, абие велегласно возопи к Богу: Аллилуия.

Икос 2

Разум богопросвещен имуще родители исцелевшия всем людем проповедаша о чудеси, явленном от святыя иконы сея, да вси притекают к ней с верою и приемлюще скорая исцеления, прославят Тя взывающе:

Радуйся, Мати Божия, прошения болящих приемлющая; радуйся, Мати милосердия, от очес слезы страждущим отирающая. Радуйся, Всемиловитая, спасение людем от Спаса являющая; радуйся, Всещедрая, Своими щедротами нас одаряющая. Радуйся, яко Тобою душам нашим утешение обретаем; радуйся, яко во успении Твоем залог бессмертия уразумеваем.

Радуйся, скорая Утешительнице и Целительнице, любовь Свою и милосердие нам являющая.

Кондак 3

Силою Духа Божия водима Мария исцеление улучивши, с радости велиею взят святую икону родную и во град Москву ко отцу и врачом тую принесе во свидетельство им, да не сокрыт будет новоявленный источник благодатных исцелений. Множество же народа, уведевше, к предивней иконе с верою прихождаху и исцеление недугов своих неисцельных приимаху, благодарно взывающе ко Господу Сил: Аллилуия.

Икос 3

Имущи вседрагую икону Твою, Владычице, яко дар благодатный, радости исполнися обитель Козельщанская, на горнем месте молитвою, потом, скорбьми и слезами созданная: зрящи бо на руку Твоею Богомладенца, Крест Всечестный в деснице Своей воздвизающая, чашу же и лжицу близ того предлежащу, с трепетом лобызает святыню Твою, взывающи согласно:

Радуйся, Одигитрие, ко обителем Горним путь открывающая; радуйся, святую обитель нашу в жилище Себе на земли устроившая. Радуйся, Крест Сына Своего, яко оружие острое в сердце Твое восприявшая; радуйся, всем на земли крест Христов на ся взявшим понести облегчающая. Радуйся, иночеству, обитель Твою возлюбившему, смысл добраго жития даровавшая; радуйся, чашу терпения и во гладе питание ему благосердно навеки принесшая.

Радуйся, скорая Утешительнице и Целительнице,

любовь Свою и милосердие нам являющая.

Кондак 4

Буря велия иногда укротися сему образу Твоему, шествующу по Русскому морю ко Отечеству нашему и вси воины христоролюбивии благодатно от потопления спасошася. Темже и мы, сицеваго явления поминание творяще, в бури жития нашего руку помощи сею иконою Твоею получитьи тщимся, Сыну же Твоему и Богу вопияти дерзаем: Аллилуия.

Икос 4

Слышим множество чудес от иконы Твоея являемых, яко и вси концы земли ко Твоему покрову, не токмо вернии, но и чуждии вере православной со страхом и упованием к Тебе, Богородице, руке свои простирают и, припадающе ко Твоему благосердию, славословия Ти сицевая возсылают:

Радуйся, ума нашего просвещение; радуйся, сердца нашего умиление. Радуйся, веру крепкую в нас утверждающая; радуйся, на спасения стези заблуждших обращающая. Радуйся, в покаянии грешных ободряющая; радуйся, и самых отчаянных надеждою спасения увеселяющая.

Радуйся, скорая Утешительнице и Целительнице, любовь Свою и милосердие нам являющая.

Кондак 5

Богом прославленную икону Твою, яко живоносный источник святости почитающе, прибегаем к Тебе во храм Твой благолепный, во славу Твою, Премилосердая Мати, созданный: прими zde, якоже

кадило благовонное, прошения всех нас, да благодарне воспоем благодееющему Тобою Богу: Аллилуия.

Икос 5

Видевше неоскудное чудес изливание, от иконы Твоея являемое, православнии люди потщашася дарми послужити Тебе, Препоблагословенная, и вместо кущи малыя, в нейже первее икона Твоя водворися, честный храм Тебе от древес сложиша, последи же и сей дом, небеси подобный, Тебе воздвигоша. Таковому усердию людей Твоих, веру неослабную к Тебе имущих, радующеся непрестанно глаголати Тебе дерзаем:

Радуйся, страну Полтавскую светом веры озарившая; радуйся, явлением чудес от святыя Твоея иконы всех увеселившая. Радуйся, Горо благодати небесныя, на горнем месте обитель Твою утвердившая; радуйся, Кивоте святыни небесныя, во храме созданном жилище Себе восприявшая. Радуйся, Божественная Трапезо и Стамно золотая, небесною манною всех напитававшая; радуйся, Лествице высокая, путь земным к Небеси показавшая.

Радуйся, скорая Утешительнице и Целительнице, любовь Свою и милосердие нам являющая.

Кондак 6

Проповедует мир весь величие Твое, Богомати, славит же Тя наипаче страна Российская немолчно; ликует обитель святая Твоя, святителей лик воспевае Тя присно, монаси и мирстии к иконе

Твоей припадают; хор земнородных согласно взывает: не забуди всех нас, Всепетая Дево, мир миру даруй и в скорбех обрадуй, всем радость пошли и воплю вонми; да воззовем вси с небожителями купно Небесному Богу: Аллилуия.

Икос 6

Возсия яко свет от небес обитель Твоя, Приснодево Владычице Чистая; великое бо множество предивных чудес являеши Ты: се отрок недвижим дыханием веры жизнь прояви; тамо слепец Иоанн не преста вопияти: даруй ми, Мати моя, да очима прозрю, – и свет от Тебе слепоту его озари. Притекаем убо и мы к чудотворней иконе Твоей, вопиюще:

Радуйся, твердая и неборимая наша заступнице; радуйся, рода христианскаго всемогущая защитнице. Радуйся, градов и весей покрове и ограждение; радуйся, обителей святых благословение и утверждение. Радуйся, яко пред святою иконою Твоею знамения чудес созерцаем; радуйся, яко на Твое предстательство все упование свое возлагаем.

Радуйся, скорая Утешительнице и Целительнице, любовь Свою и милосердие нам являющая.

Кондак 7

Хотящим врагом обитель Твою утеснити и инокинь стадо, о Христе любовию собранное, враждой поразити, скоро познаша сии Твое заступление, стеной неборимой Твоей обстоими. И мы с верою взираем в грядущую даль веков и времен благодарно вопия Спасителю Богу: Аллилуия.

Икос 7

Дивно и доныне прославляется святая икона Твоя, Владычице, знаменьями исцелений от нея являемых. Ты бо, Пречистая, бесныя исцеляет, хромым даруеши хождение, слепым прозрение, расслабленным крепость и силу и всяк недуг в людех по вере врачуеши. И мы, видяще чудеса сия и стекшеся в храм Твой, благолепием чистым сияющий, молим Тя неотступно:

Радуйся, всем призывающим Тя скоро готовая помощи; радуйся, преславней обители Твоей, всем страждущим и скорбящим светлая радости. Радуйся, яко в иконе Твоей чудотворящей залог милости вечныя обретаем; радуйся, яко Твоею благодееющею силою в житии своем путь к Небеси улучаем. Радуйся, всех немощных духом и телом врачевство верное; радуйся, всех скорбящих и обремененных облегчение всеблагое.

Радуйся, скорая Утешительнице и Целительнице, любовь Свою и милосердие нам являющая.

Кондак 8

Странное и преславное видим таинство, яко дивная и ужасная явила еси во обители Твоей, о неисчерпаемая в чудесех Своих Благостыня! Егда во утро предпразднества Твоего Вхождения во храм Господень приведоша сестры инокиню Параскеву, зело расслабленну, ко Твоему пречистому образу, и укрепила еси сию во мгновении ока, даровавши ей силу и движение омертвелому составу ея телесе, и сподобися та за Божественною службою Святых Таин

причаститися, последи же, исходящи, воспет со множеством людей, бывших во храме, хвалу Богу: Аллилуия.

Икос 8

Всяк земнородный да възиграется духом, просвещаем и освящаем от цельбоносныя святыни Твоея, Радосте наша и Похвало, да не умолчит никогда силы Твоя глаголати, аще и недостоин есть, пред величеством славы Твоея; сего ради и мы преславная глаголем о Тебе, неизглаголанная Тайно; приими сицевая от нас, яко от глубин духа нашего возносимыя хвалы и благодарения:

Радуйся, хранительнице наша в настоящем веце; радуйся, предстательнице наша в будущей жизни. Радуйся, жестокость и окаменение сердца нашего любовью Своею умягчающая; радуйся, чистым и благим сердцем познавати Тя научающая. Радуйся, яко страсти наша Тобою побеждаем; радуйся, яко жало греховное страстию Сына Твоего и Бога в себе умерщвляем.

Радуйся, скорая Утешительнице и Целительнице, любовь Свою и милосердие нам являющая.

Кондак 9

Всякое естество человеческое удивися преславному чудеси, явленному исперва, последи же и всем явленным и являемым zde и на всяком месте от святыя иконы Твоея, Препоблагословенная Матерь Живота, яко всяку похвалу от земли превосходит небесная слава Твоя: не точию земли нашея, но и иных стран любомудрие и врачевство преклоняются

смиренне и честне пред величеством непостижимыя тайны исцелений, от Твоея силы источаемых. И мы, грешнии, в недузех и скорбех отягченнии, не ведуще иныя на земли Заступницы, ни благия Утешительницы, токмо Тебе, о Богомати, и ко Твоему благосердию припадающе во умилении сердца за премногую милость к нам, недостойным, возсылаем Богу милующему и спасающему всех нас Тобою: Аллилуия.

Икос 9

Витийство человеческое не возможет достойно воспети Тя, о Всепетая Мати, всему миру и стране нашей во святыни икон Твоих неисчислимая знамения и чудеса явльшую; мы же, просвещаемии, сиянием таковыя славы и богатством милостей Твоих недостойнству нашему, непрестанно тщимся хвалу Ти воздати молении сими:

Радуйся, Царице Небесе и земли, Престолу Господню предстоящая; радуйся, Заступнице вечная, Христа за ны умоляющая. Радуйся, Мати чадолюбивая, всех охраняющая; радуйся, заблуждших от пути истины к покаянию призывающая. Радуйся, молебнице теплая, Судию всех умилоствляющая; радуйся, вход во обители вечныя кающимся открывающая.

Радуйся, скорая Утешительнице и Целительнице, любовь Свою и милосердие нам являющая.

Кондак 10

Спасти хотящи избранную Богом страну и прибегающия к Тебе люди, дивно прославила еси,

Богоматерь Пречистая, икону Твою Козельщанскую промыслительными знаменьями милостей Твоих всебогатых. Аще бо не бы предстояла молящи о нас, кто бы ны избавил от толиких бед, кто бы сохранил ны до ныне свободны? Несть числа чудесем Твоим, Всеблагая, не отступим, Владычице, от Тебе. Даруй ныне и присно всем нам зрети своя прегрешения, открь в нас источники слез, да омыем падение в бездны греховныя и, познавше Твоего милосердия неизследимую бездну, возстанем и поработаем поюще к небесем прославльшему Тя Всемогущему Богу: Аллилуия.

Икос 10

Стена еси крепкая обители Твоей, якоже и всему миру, ограждающая нас от врагов досаждения, верою и любовью чтущих Тя, честному образу Твоему покланяющихся и приносящих тепле благодарения таковая:

Радуйся, чистоты девства и целомудрия сердца ревнителей в любовь Своего сердца приемшая; радуйся, печаль и обиду от мира в небесную радость по вере преложшая. Радуйся, вдов и сирот заступление; радуйся, домашних церквей охранение. Радуйся, сласти земныя презирати нас научающая; радуйся, преходящая блага мира греховнаго ни во чтоже вменяти побуждающая.

Радуйся, скорая Утешительнице и Целительнице, любовь Свою и милосердие нам являющая.

Кондак 11

Пение архангельское умиленно приносим Ти, Богородице Дево: «Радуйся, Благодатная Марие, Господь с Тобою, благословенна Ты в женах!» – обаче и тако величия славы Твоея объяти не мним, высота бо еси неудобовосходимая человеческому помыслу и глубина неудобозримая и ангельскому очеси. Кий язык восхвалит Тя, кое слово возвеличит, познавая убо таковыя немощи наша? Темже трепетно вопием Рожденному от Тебе Божественному Слову: Аллилуия.

Икос 11

Яко светоносная свеща явися святая икона Твоя, Владычице и Матерь Света, свет благодати небесныя всем излиывшая, пред неюже мы благоговейне предстояще взываем Ти: избави грады и веси, дома и нивы наша от всякаго вреда и зла, да с благодарением непрестанно воспоем Ти:

Радуйся, удары грома и молнии от нас отводящая; радуйся, от сухости, града, червя и иныя пагубы вертограды и нивы наша спасающая. Радуйся, от огненнаго запаления и зловредных поветрий нас орошающая; радуйся, от глада и смерти напрасныя нас свободящая. Радуйся, путешествующим по суше и морю вспоможение крепкое; радуйся, язв душевредных и болезней телесных врачевание верное.

Радуйся, скорая Утешительнице и Целительнице, любовь Свою и милосердие нам являющая.

Кондак 12

Благодать Твою свыше подаждь нам, Богоблагодатная Дево; до последних дней мира святую обитель Твою сохрани; восхотевшим в ней жити путь добр к Небеси укажи; любовь и терпение со страхом Господним стяжати в сердцах умудри, да со Ангелы и всеми святыми воспоют Превечному Богу: Аллилуия.

Икос 12

Поем чудеса Твоя от святых иконы пред всеми явленныя, величаем Подателя всяческих Бога, даровавшего в ней толикое всем утешение: болящим исцеление, скорбящим радование, нищим помощь, окованным свободу, мятущимся духом упование бодрое, слабым в вере укрепление твердое; зрим начертание кроткаго лика Твоего и объятаго любовью Твоею, Богомати, Богомладенца Христа, лобызаем священные знаки страданий Его за грехи всего мира – Крест и Чашу Святую, – и покланяемся непостижным тайнам еже от Тебе рождества непобедимыя силы креста и светозарнаго всем Воскресения, и воспеваем Ти вечную славу:

Радуйся, во славе приседящая Сыну Твоему на Престоле Небеснем; радуйся, прерадованная Мати Царева, мир христианский под вечный покров Своей любовью объявшаая. Радуйся, уповающим на Тя конец живота непостыден дающая; радуйся, безболезнену и мирну кончину верным Богу до смерти ниспосылающая. Радуйся, в мытарствех воздушных душе человечестей путь к Судии

указующая; радуйся, взывающим к Тебе до конца живота красоту вечной жизни яже являющая.

Радуйся, скорая Утешительнице и Целительнице, любовь Свою и милосердие нам являющая.

Кондак 13

О, Всепетая Мати, Божественная Славо и Красото небесе и земли, неисчерпаемое чудес море, заступнице и хранительнице рода христианского и святых обители Твоея, прими недостойное сие, обаче благодарное от сокрушенного сердца возносимое к Тебе моление; яви нам до конца Матернее Твое милосердие: в скорби и напасти не остави нас сирых и в час смертный Твоим теплым предстательством причастники вечного блаженства сотвори, да памятующе выну Твоя дивная о нас заступления со всеми святыми не престанем воспевати Богу: Аллилуия.

(Этот кондак читается трижды, затем икос 1 и кондак 1)

Икос 1

Архангели и Ангели, Херувими и Серафими и вся Небесныя Силы, зряще Тя на небеси и на земли, яко неисчерпаемый источник благодатных исцелений, непрестанно славят Тя, Присноблаженная Богородице: мы же, грешнии на земли, поминающе дивное знамение милости Твоея, еже в сия последняя времена явила еси в цельбоносней иконе, наследии предков дражайшем, от лет древних из рода в род преходящей, ублажаем Тя сие:

Радуйся, Небесная Царице, честнейшая Херувим и славнейшая без сравнения Серафим; радуйся, от всех

родов на земли похвалами ублажаемая. Радуйся, одесную Сына Твоего и Бога предстоящая; радуйся, ко Господу Спасу всех нас приводящая. Радуйся, яко в видимом образе Твоем невидимую силу благодати обретаем; радуйся, яко на Твое предстательство все упование наше возлагаем.

Радуйся, скорая Утешительнице и Целительнице, любовь Свою и милосердие нам являющая.

Кондак 1

Избранней Владычице и Заступнице рода христианскаго, знаменьи чудес дивных от святых Своя иконы в стране нашей возсиявшей, благодарственная и умиленная пения немолчно приносяще, яко Матери Господней, в печалех наших и болезнех вопием:

Радуйся, скорая Утешительнице и Целительнице, любовь Свою и милосердие нам являющая.

Молитва

О Пресвятая Дево Владычице Богородице, добропослушная Божественному Слову Мати Пречистая, от всех родов избранная, на небеси и на земли ублажаемая, прими и сие благодарение наше и всеблагоговейное поклонение чудотворней иконе Твоей, юже, яко многоцелебный источник Твоя благодати, благоизволила еси явити стране нашей православней и святей обители сей. Архангельский глас вопием Ти; Чистая: «Обрадованная, радуйся, с Тобою Господь и Тобою с нами!» Предстательством

Твоим и заступлением. На Небеси у Престола Всеблагаго Бога никтоже да изыдет отсюда упования своего тощ и неуслышан.

О, Пречудная и высшая всех тварей небесных и земных Богомати Дево! Благодарне поминающе преславная чудеса от святого образа Твоего дарованная, молим Тя, Всеблагая, не лиши от него и нас дивнаго знамения во спасение наше. Помяни щедроты Твоя древняя, в судьбах Отечества нашего явленная, и да престанем вси от лукавств своих, имиже прогневахом Тя в век сей мятежный удалением от любви, еюже возлюби и возрасти нас Церковь Святая. О, премудрая небесная Началоводительнице ко спасению инокинь обители, именем Твоим нареченная, юже избрала еси в достояние Свое на месте сем, Тобою благословеннем, яви ю пристанище тихое всем скорбящим и обремененным и чающим блаженныя вечныя жизни. Грешнии есмы, Пренепорочная Владычице, но Твои до века. Озари убо души наша светом Божественная благодати Твоея, покрый нас от всякаго зла, скорби и печали; огради от всякия напасти, клеветы человеческия и навета вражия; немощным и болящим здравие даруй; кающихся грешников прости и от плена страстей свободи; отступившия от православныя веры и погибельными ересьми ослепленныя светом богопознания просвети и святей Апостольстей Церкви причти. Молим Тя, умиленно, сохрани и помилуй пастырей Церкви Православныя и всех верных чад ея; утверди житие наше в мире; управи пути и советы наша в правде, во еже

открытися в них Царству Христову; даруй нам кончину христианскую, безболезнену, непостыдну, мирну, Божественных Таин причастну, и Сама нам в час той предстани и спаси посреде мытарств воздушных от мрака и скорби лютыя; в страшный же день Суда сподоби ны стати одесную Сына Твоего, Христа Бога нашего. Молим Тя, Дево Воспетая, призри благосердием Твоим на обитель сию и сохрани ю до века целу и неврежденну, да выну чистотою возвышается и славится в ней величество Единосущныя Троицы и Твое препетое и преблагословенное имя во веки. Аминь.